

Lauxsae Wij Lo

老师打嗝

武鸣县太平镇庆乐小学五年级 黄俊

Yaek cuengqhag lo, banhcuiyin Cinz lauxsae byaij haeuj gyausiz daeuj, fajnaj rag ndaej raezrangrang. Yo, mboujrox dwg lwg manzgyaengj lawz youh daujluenh lo. Gyoengq doengzhag sikhaek naengh ndaej sohswd. Cinz lauxsae cam: “Ngoenzneix banhaet Vangz lauxsae hwnj dangz yijvenz, sou riu gijmaz?”

“Hi hi hi hi hi!”

“Sou lij riu! Ngoenzneix dwg bouxlawz daiqdaez daujluenh? Swhgeij gag ndwn hwnjdaej ba!”

Cinz lauxsae bingzciengz caeuq gyoengqraeuz gig doxndei, cix lumj daxmeh youh lumj baengzyoux, coengzlaiz mbouj luenh fat beizheiq gvaq. Daihgya cungj nyex gyauej yawj coh Lij Mingz bae, daeg manzgyaengj neix lij goemq bak riuhihi ne!

De ndwn hwnjdaej naeuz: “Lauxsae, gou mbouj dwg daeg-daengq yaek riu Vangz lauxsae, dwg de itmienh doeg hot seigeq itmienh wij, o, couh lumj yienghneix: w, w, 碧玉(wk)装成(wk)一树高, 万条垂下(wk)绿丝绦(wk), hi hi hi hi.”

“Lij Mingz, wij couh baenzlawz la? Lauxsae couh mbouj ndaej wij la? Gyoengqsou yienghneix riu lauxsae doiq lauxsae caen mbouj aeueiq ya!”

“Mbouj dwg, gizsaed Vangz lauxsae ngoenzlwenz banringzgvaq hwnjdangz seiz couh wij lo, ngoenzlwenz gyoengqraeuz mboujmiz saek boux riu de, hoeng, ngoenzneix de lij wij mbouj dingz, gou caenh

gangj gawq: Meh ha, Vangz lauxsae gwn lai lo, wij baenz ngoenz mbouj rox dingz. Daihgya dingqnyi le couh riu hi hi hi lo.”

Gyoengq doengzhag cungj nyaenx mbouj ndaej riu cumcum hwnjdaej. Sawqmwh sing riu mboujmiz lo, aenvih daihgya yawjraen lwgda lauxsae hamz raemxda dwk, de naeuz: “Gyoengq doengzhag, sou rox lwi, gij bingh dungxin Vangz lauxsae gig yenzcung, gaeng fazcanj daengz veiaiz lo. Cijaeu de baez dwgrengz gvaqlai, mboujdanh wij, aendungx lij in dwk ndwn cungj ndwn mbouj baenz. Vangz lauxsae hajcib lai bi lo, gyoengqraeuz heuh de daezcaeux duiyouh, hoeng de naeuz daj it nienzgaep son sou daengz seizneix, sij mbouj ndaej vut sou bae ha! Gyoengqsou sieng aensim Vangz lauxsae, de caen siengj duiyouh baema ranz lo.”

Gyoengq doengzhag dingq le cungj daej hwnjdaej. Cuengqhag le, daihgya cungj mbouj baema ranz, mwngz coenz gou gawq lwnh hwnjdaej. Miz mbangj naeuz: “Ai! Vangz lauxsae wij gou caen mbouj wangdang riu de, gwnz seiqgyaiq miz gij yw ienq gai couh baenz lo!” Miz mbangj naeuz: “Baezlaeng bouxlawz lij riu Vangz lauxsae, couh hawj de sij 20 faenh genjdauj.”

Lijmiz mbangj naeuz: “Deng deng deng, bouxlawz lij daujluenh dawz Vangz lauxsae gik deuz, couh



hawj de boiz!”

Ngoenz daihngaih, Vangz lauxsae ngamq byaij haeuj gyausiz, yo, gwnz gyangjdaiz cuengq miz hung-hung iqiq geijcib aen hab. A! Dwg yw dungxin, moix aen hab gwnzde cungj nem mbaw saw ndeu: Vangz lauxsae, gi yw dungxin bienfueng neix gig lingz.

“Vangz lauxsae, hoh mwngz ndang canq!”

“Vangz lauxsae, cingj mwngz yienzliengh.”

“Vangz lauxsae, gou itdingh roengzrengz doegsaw, daengzcog dang boux yihyoz bozsw ndeu, yw ndei gij bingh mwngz!”

Yi, lijimiz aen guenqsozliu douqmingz ndeu, ndawde miz 46 aen hing, yinsingh, gwnz bingz nem miz mbaw ceijdiuz ndeu sij naeuz: “Vangz lauxsae, raeuz gyaenz mwngz!”

Gyanghaemh, gou ninz youq gwnz congz, loq raen swheij ndaej dang boux yihyoz bozsw. Gou yenzcauh ok cungj yw ndaej yw aizcwg ndeu, daj haenx gyoengqvunz caiq mbouj yungh nyaenxsouh gak cungj bingh caeuq indot. Ndaw moengh, gyoengqraeuz caeuq Vangz lauxsae riu dwk simhai bae.

(指导老师:黄春菊)

Gij Dajsuenq “6·1” Gou

我的“六一”计划

环江毛南族自治县
人和小学一年级 黄洪洋

Muengh ha, muengh ha, “6·1” ciet lwgnyez couh yaek daeujdaengz lo. Baez “6·1” neix, gou itdingh hawj daxboh daiq gou bae bouqsaw cawx bonj saw govai gou ceiq maij——《Goj Lwgnyez》. Aenvih Cinz lauxsae ciengz-ciengz doiq dou gangj lai yawj saw govai naengz lai ndaej cihsiz, lai nyinh cih. Linghvaih, gou lij siengj youq “6·1” ngoenzciet lwgnyez, youq gwnz vujdaiz yozyau ciengq souj go ndeu hawj doengzhag dingq. Aenvih sing go gou naengz daiq vaiqvued hawj bouxwnq, doengzseiz hix daiq bae gij hohfuk gou.

(指导老师:覃玉往)



Haetnaengz roek diemj buenq, gyoengqvunz ngamq hwnqcong, yawj diuzloh mbanj, couh mumjyumq yawjraen aen ngaenzndang hungsang ndeu, ndang daenj mizcaifuz, fwngz gaem sauqbaet, mbouj dingz dwk sauq roen. Mbouj geij nanz, aen lahgizciz rog mbanj swng hwnj baenz geu baenz geu hoenz. Boux vunz neix couhdwg bohlungz gou, hix dwg cunhcangj mbanj raeuz.

Bi' gvaq, aen mbanj raeuz gaih-cenj “Vujmingz Gyaunde, Lajmbanj Cinghseuq” hozdung, bohlungz gou gig yungjhu hangh gunghcwnz doiq nungzminz miz ik neix, cizgiz bae guh, caemhcai deng senj guh baujgezyenz. De gag ok cienz cawx sauqbaet, doengj, lahgizcanj daengj hongdawz.



Lajmbanj “Meijyungzsw”

乡村“美容师”

武鸣县仙湖镇中桥小学五(1)班 梁敬辉

Hozdung ngamq gaihcanj seiz, vunzmbanj lij caengz siengj guh, gij sibgvenq rwix mbangjboux vunzmbanj lij gaih mbouj ndaej, ciengzseiz miz vunz dawz nyapnyaj roxnaeuz boeg youq henz roen, roxnaeuz boeg youq henz daemz, roxnaeuz boeg youq bakmbanj. Danghnaeuz bohlungz mbouj raen boux boeg, swheij couh mbouj ok sing sauq seuq. Danghnaeuz de bungz boux boeg, couh naihsim dwk gangj cwngcwz, gangj ndeicawq.

Miz ngoenz ndeu banringzgvaq, bohlungz ciuq laeh gaem sauqbaet caeuq lahgizcanj okbae dajsauq, ngamq byaij daengz bakmbanj, cingq yawjraen Daeggvangh——boux ndaw mbanj ceiq gaemhmengz he youq henz roen boeg doengj nyapnyaj ndeu. Bohlungz sikhaek byaij daengz henz ndang de, unqswnh dwk naeuz:

“Daeggvangh, nyapnyaj mbouj ndaej boeg youq gizneix, wnggai boeg haeuj lahgizciz bae.” Siengj mbouj daengz Daeggvangh mboujdanh mbouj dingq, lij singhung hemq hwnjdaej: “Yu, mwngz miz maz giengz guenj gou, neix dwg dieg ndaw mbanj, gou gyaenz boeg gizlawz cungj ndaej, mwngz guenj mbouj daengz!” Gangj sat, lij nyoengx bohlungz mbat ndeu. Bohlungz baez soenx, ca di ngaiz laemx. Seizneix, haujlai vunzmbanj humx gvaqdaej, mwngz coenz gou coenz, cungj naeuz Daeggvangh. Mizmbangj naeuz: “Danghnaeuz bouxboux lumj mwngz yienghneix luenh boeg nyapnyaj, aen mbanj raeuz couh bienqbaenz lahgizcangz lo.” Mizmbangj naeuz: “Miz lahgizciz lo, mwngz lij boeg gizneix, mwngz dwg daegdaengq gauj buqvaih!” …… Daeggvangh raen vunz lai cungj naeuz swheij mbouj

deng, najhoengz dwk ngaemgyaeuj roengzdaej. Bohlungz lij dwg unqswnh dwk doiq de naeuz: “Daeggvangh, mwngz rox lwi? Mbanj raeuz couhdwg aen ranz hung he, cijmiz bouxboux gangj veiswng, aen ranz raeuz cij ndaej cinghseuq, gyaunde.” Daeggvangh ngiengx gyauej hwnjdaej, najgaej dwk doiq bohlungz naeuz: “Cunhcangj, doiq mbouj hwnj, gou loek lo, cingj mwngz yienzliengh.” Caezgya dingq le bek-fwngz hwnjdaej. Daeggvangh ngeng aen doengj roengzdaej, yungh fwngz dawz nyapnyaj bued haeuj ndaw doengj bae, bohlungz hix bangcoh sauq hwnjdaej. Yawj Daeggvangh byaij bae lahgizciz, bohlungz habhoz dwk ngaekngaek gyauej.

Daengz seizneix, hozdung gaeng gaihcanj ndaej bi lai lo, miz bohlungz daiq, gyoengq beixnuengx cungj gyahaeuj hangh hozdung neix. Seizneix, bohlungz moix ngoenz cungj sauq roen mbanj, sousib nyapnyaj, dingh seizgan coemh nyapnyaj. Aen mbanj raeuz bienq ndaej engq seuq lo, raemx bienq ndaej engq saw lo, faex bienq ndaej engq heu lo, mbwn bienq ndaej engq lamz lo. Gyoengq beixnuengx haenh bohlungz dwg “Lajmbanj Meijyungzsw”!

(指导老师:潘文清)